

四庫全書

史部

欽定四庫全書

輿地廣記卷二十四

宋 歐陽忞 撰

江南東路

次府江寧府春秋屬吳戰國屬越後屬楚秦屬鄣郡二
漢屬丹陽郡吳王孫權初鎮丹徒謂之京城後徙都秣
陵改為建業晉平吳以為丹陽郡及揚州刺史治東晉
元帝渡江復都焉改丹陽太守為尹宋齊梁陳因之常

以京口為重鎮隋平陳郡廢夷蕩耕墾更於石頭城置
蔣州大業初復置丹陽郡唐武德三年置揚州七年平
輔公柘復改為蔣州八年又改為揚州九年州徙治江
都以其地屬潤州至德二載析置江寧郡乾元元年曰
昇州上元三年州廢光啓三年復置五代時南唐李氏
竊據升為江寧府皇朝開寶八年克復降為昇州天禧
二年復升江寧府建康軍節度今縣五

次赤上元縣本楚邑楚威王以其地有王氣埋金以鎮

之故曰金陵秦改曰秣陵二漢屬丹陽郡吳建安十六年改曰建業因都焉晉武帝平吳復曰秣陵本治去京邑六十里故治村是也安帝義興九年移治京邑宋齊梁陳因之隋平陳省秣陵入江寧縣置蔣州唐武德三年改江寧曰歸化屬揚州八年改歸化曰金陵九年改金陵曰白下屬潤州貞觀九年復改白下曰江寧肅宗上元二年改曰上元乾元元年置昇州南唐置江寧府故建康縣本建鄴晉武帝既復改建業為秣陵太康三年

又分秣陵之水北置建業縣後避愍帝名改曰建康隋省入江寧湖熟鎮本湖熟縣二漢晉宋屬丹陽郡後省入焉有蔣山石頭城六朝以為重鎮

次赤江寧縣晉武太康元年分秣陵置臨江縣二年更名唐既改江寧為上元南唐復析上元置江寧分治郭下

次畿甸容縣二漢晉宋屬丹陽郡隋屬江都郡唐武德三年置茅州七年州廢屬蔣州九年屬潤州乾元元年

屬昇州有茅山一名句曲山形如句字之曲縣取名焉

次畿溧水縣本溧陽縣二漢晉宋屬丹陽郡隋改為溧水縣屬蔣州唐武德三年屬揚州七年屬宣州乾元元年屬并州伍子胥自楚出奔未至吳而疾止中道乞食於溧陽即此

次畿溧陽縣唐武德三年析溧水縣置屬揚州九年屬宣州上元元年屬昇州

望宣州春秋屬吳戰國屬越後屬楚秦屬鄣郡二漢屬

丹陽郡吳為重鎮晉徙丹陽於建業而以其地置宣城
郡宋齊梁陳因之梁兼置南豫州隋平陳郡廢改州為
宣州大業初復置宣城郡唐武德三年曰宣州天寶元
年曰宣城郡吳升為寧國軍節度皇朝因之今縣六
望宣城縣本宛陵縣二漢為丹陽郡治晉置宣城郡宋
齊梁陳因之隋廢郡而改宛陵曰宣城置宣州唐因之
亦吳懷安縣地屬丹陽郡晉屬宣城郡宋齊梁陳因之
隋省入宣城有敬亭山

望南陵縣漢春穀縣地屬丹陽郡東漢晉因之孝武改
為陽穀後省梁置南陵縣及南陵郡陳置北江州隋平
陳州郡並廢屬宣城郡唐武德四年屬池州州廢來屬
亦漢宣城縣地屬丹陽郡東漢省之晉復置宣城郡後
省故城在今縣東

緊涇縣二漢屬丹陽郡晉屬宣城郡宋齊梁陳因之唐
武德三年置南徐州尋更名猷州八年州廢來屬故安
吳縣吳分宛陵置晉宋齊梁陳屬宣城郡隋省入涇唐

武德三年復置八年又省亦陵陽縣地二漢晉屬丹陽郡成帝以皇后諱改為廣陽縣宋因之後省有陵陽山列僊傳云陵陽子明釣得白龍放之後三年龍迎子明上陵陽山僊去因以名縣

繁寧國縣吳分宛陵置晉宋齊梁陳皆屬宣城郡隋省入宣城唐武德三年復置屬宣州六年又省天寶三載復置

繁旌德縣唐寶應二年析太平縣置屬宣州有棲真山

中太平縣唐天寶十一載析當塗涇縣置屬宣州大歷
中省永泰中復置

上歙州春秋屬吳戰國屬越後屬楚秦屬鄣郡二漢屬
丹陽郡吳孫權分置屬都郡晉武帝改為新安郡宋齊
因之後廢隋平陳置歙州大業初置新安郡廢武德四
年復置歙州天寶元年曰新安郡皇朝因之統縣六

望歙縣二漢屬丹陽郡吳孫權使賀齊平山越於是立
始新都尉於歙之華鄉令齊守之遂置始新縣及新都

郡晉太康元年改郡曰新安後郡廢而省始新入歙隋
平陳廢歙開皇十一年復置屬歙州大業初屬新安郡
唐為歙州治焉

望休寧縣孫權分歙置休陽縣晉武帝改為海寧屬新
安郡宋因之隋開皇十八年改為休寧大業初置新安
郡唐屬歙州

望祈門縣本黟縣地唐代宗時歙州賊方清據此為壘
永泰二年平賊因其壘置祈門縣屬歙州有祁山閭門

灘善覆舟

望婺源縣唐開皇二十八年析休寧置屬歙州

望績溪縣唐永徽五年分歙置北野縣屬歙州後更名績溪

緊黟縣二漢屬丹陽郡晉宋屬新安郡隋平陳縣廢開皇十一年復置屬歙州唐因之有林歷山吳賀齊討山越賊保林歷山四面險絕齊使以鐵杙琢山而升出其不意遂平賊

上江州古揚荆二州之境春秋戰國屬楚秦屬九江郡
二漢屬廬江豫章二郡晉惠帝置尋陽郡兼置江州初
治豫章成帝咸康六年移治尋陽中流襟帶常為重鎮
宋齊梁陳因之隋平陳郡廢大業初州廢置九江郡唐
武德四年復置江州天寶元年曰尋陽郡皇朝因之今
縣五

望德化縣本尋陽縣二漢屬廬江郡吳屬蘄春郡晉復
屬廬江永興元年置尋陽郡咸康六年江州自豫章徙

治尋陽縣本在江北溫嶠移置江南後省入柴桑縣二
漢屬豫章郡曹公攻劉備於夏口時孫權擁兵柴桑以
觀成敗諸葛亮說權與并力拒曹公故城在今縣南所
謂楚城鎮是也宋齊梁陳皆為尋陽郡及江州治焉隋
平陳郡廢復改縣曰尋陽開皇十八年改曰彭蠡大業
初改曰湓城置九江郡唐復曰尋陽置江州五代時改
為德化禹貢九江在州西北始別於鄂陵終會於江口
有廬山柴桑山彭蠡湖

緊德安縣本歷陵縣地二漢屬豫章郡晉屬鄱陽郡後
省五代時置德安縣屬江州有禹貢敷淺原

中瑞昌縣五代時置屬江州有王喬山清虛玉華洞

中湖口縣五代時置屬江州晉盧循之敗悉力柵左里
宋武帝攻其柵循單舸走衆皆降即彭蠡湖口今縣是
也

中彭澤縣禹貢彭蠡澤在西因以名縣二漢晉屬豫章
郡宋省之後復置梁置太康郡隋梁陳郡縣並廢而置

龍城縣屬江州開皇十八年復改曰彭澤唐因之有馬
當山

上池州春秋屬吳戰國屬越後屬楚秦屬鄣郡二漢屬
丹陽郡晉屬宣城郡宋齊梁陳隋因之唐武德四年析
宣州置池州貞觀元年州廢永泰元年復置後曰池陽
郡皇朝因之今縣六

望貴池縣本石城縣地二漢屬丹陽郡晉以後屬宣城
郡隋平陳縣廢開皇十九年置秋浦縣屬宣州唐分置

池州五代時改秋浦為貴池有烏石山貴池

上青陽縣本臨城縣吳置晉屬宣城郡宋齊梁陳因之
隋省入南陵唐天寶元年析置青陽縣屬宣州後屬池
州有九華山

上銅陵縣本南陵縣地唐析置義安縣又廢義安為銅
官五代時置銅陵縣屬江寧府皇朝開寶八年來屬有
梅根山利國山

上建德縣本至德縣唐至德二年析鄱陽秋浦置屬江

州乾元元年屬饒州永泰元年來屬五代時省後復置
改為建德有石門山闌溪

上石埭縣唐永泰中析青陽秋浦置治又石埭城屬池
州

中下東流縣五代時置屬江州皇朝太平興國三年來
屬

上饒州春秋屬楚後屬吳戰國屬越後復屬楚秦屬九
江郡二漢屬豫章郡吳孫權分置鄱陽郡晉宋齊梁陳

因之梁兼置吳州隋平陳郡廢改州為饒州以其物產
豐饒大業初復置鄱陽郡唐武德四年曰饒州天寶元
年曰鄱陽郡皇朝因之今縣六

望鄱陽縣本楚邑春秋吳伐楚取鄱是也秦時吳芮為
番陽令甚得江湖間心號曰番君二漢屬豫章郡吳置
鄱陽郡晉以後因之隋置饒州唐因之有鄱江故廣晉
縣吳置曰廣昌郡吳芮故城也晉太康元年更名為鄱
陽郡治宋因之後省唐武德五年復置八年省入鄱陽

望餘干縣故越之西境所謂干越也二漢曰餘汗屬豫章郡晉宋齊梁陳隋屬都陽郡唐屬饒州有餘水北流入贛江

望浮梁縣本新平縣唐武德四年析都陽置屬饒州八年省開元四年復置新昌天寶元年更名浮梁有石藏山

望樂平縣本吳樂安縣晉宋屬都陽郡後省唐武德四年置樂平縣屬饒州九年省後復置

望德興縣五代析樂平置屬饒州有銀山

中安仁縣皇朝開寶八年以餘干縣地置安仁場端拱元年升為縣

上信州春秋戰國皆屬越後屬楚秦屬九江會稽二郡二漢屬豫章會稽二郡晉宋及隋屬鄱陽東陽二郡唐乾元元年析饒州之弋陽衢州之常山玉山及建撫二州之地置信州後曰上饒郡皇朝因之統縣六

望上饒縣吳置晉省之宋復置屬鄱陽郡後省唐武德

四年復置七年省入弋陽乾元二年復置并置信州有
上饒江

望玉山縣唐證聖二年析常山須江弋陽置屬衢州乾
元元年來屬有懷玉山

望弋陽縣吳置葛陽縣晉宋屬都陽郡隋開皇十二年
改為弋陽屬饒州唐乾元元年來屬有弋溪寶豐鎮皇
朝開寶八年升為縣景祐二年省康定元年復置慶歷
三年又省入弋陽

望貴溪縣唐永泰元年析弋陽置屬信州有龍虎山貴溪

中鉛山縣五代時置皇朝開寶八年以縣直隸京師後屬信州有鉛山

中永豐縣唐乾元二年析上饒置屬信州元和七年省入為鎮皇朝熙寧七年復升為縣有豐山有永豐溪

上太平州自唐以前地理與宣州同南唐置雄遠軍皇朝開寶八年改平南軍太平興國三年升為太平州今

縣三

上當塗縣本漢丹陽縣地晉太康二年分置于湖縣成
帝以淮南當塗流民寓居于湖乃僑立當塗縣以治之
分于湖為境而於江南僑立淮南郡治于湖以當塗屬
焉宋齊梁陳皆因之隋平陳郡及于湖廢以當塗屬丹
陽郡唐武德三年置南豫州八年州廢屬宣州乾元元
年屬昇州上元二年復屬宣州南唐置雄遠軍皇朝改
為平南軍又改為太平州于湖縣故城在今縣南丹陽

鎮本丹陽縣二漢晉宋屬丹陽郡後廢唐武德三年析
江寧縣復置屬饒州九年州廢屬宣州貞觀元年省入
當塗有牛渚山一名採石在縣北大江中晉溫嶠回軍
至牛渚磯聞鼓樂之音水深不可測乃燬犀角照之見
水族奇形異狀朱衣躍馬夜見夢嶠曰與君幽明道別
何得相照有丹陽湖慈湖

中蕪湖縣本吳鳩茲地左傳楚子重伐吳克鳩茲是也
二漢晉屬丹陽郡晉宋僑立襄垣縣寄治蕪湖後屬淮

南郡宋齊梁陳因之隋平陳省襄垣入當塗五代時析
當塗縣置蕪湖縣屬宣州皇朝太平興國二年來屬有
尺鑄山蕪湖

中繁昌縣晉之繁昌本屬襄城郡亂後於此僑立屬淮
南郡而分子湖為境宋齊梁陳因之隋平陳省繁昌入
當塗五代時析當塗復置屬宣州皇朝太平興國二年
來屬有靈山隱靜山

同下州南唐軍春秋戰國皆屬楚秦屬九江郡漢屬豫

章郡東漢晉宋皆因之隋屬九江豫章二郡唐屬江洪二
州皇朝太平興國二年置南康軍今縣三

望星子縣本漢彭澤縣地屬豫章郡後為德化縣之星
子鎮皇朝太平興國二年置星子縣屬江州七年置南
康軍有廬山彭蠡湖洛星石昔有星墜水化為石縣鎮
蓋因石為名吳越錢氏封為寶石山

望建昌縣本漢海昏縣地昌邑王賀廢遷於此屬豫章
郡東漢永元十六年置建昌縣晉宋齊梁陳隋因之而

省海昏入焉唐武德五年置南昌州八年州廢屬洪州
皇朝太平興國七年來屬亦永脩縣地東漢中平中置
晉宋齊梁陳皆屬豫章郡隋省入建昌唐武德五年復
置八年省亦新吳縣地東漢中平中置晉宋齊梁陳皆
屬豫章郡隋省入建昌唐武德五年復置八年省永淳
二年又置後省

上都昌縣本漢彭澤縣地唐武德五年置屬洪州八年
廢屬江州皇朝太平興國七年來屬有桑落山晉將劉

穀為盧循所敗之地有釣磯山晉陶侃徵時嘗登此垂釣

同下州廣德軍春秋屬吳戰國屬越後屬楚秦屬鄣郡
二漢屬丹陽郡晉屬宣城郡宋齊因之梁置大梁郡又
改為陳留郡隋平陳郡廢屬宣州唐因之南唐屬昇州
皇朝開寶八年屬宣州太平興國四年置廣德軍今縣
二

望廣德縣本漢丹陽郡地鴻嘉二年以為廣德國封中

山靖王勝之後雲客是為夷王晉太康中置廣德縣及宋齊皆屬宣城郡梁分置石封縣并置大梁郡又改為陳留郡隋平陳郡廢改石封為綏安縣屬宣州而省廣德入焉唐武德二載改綏安為廣德南唐屬昇州皇朝屬宣州後置廣德軍有桐源山桐水左傳楚子西子期伐吳及桐汭即此

望建平縣本廣德縣之郎步鎮皇朝端拱元年置建平縣屬廣德軍有伍牙山伍員伐楚還吳經此山因以為

名



輿地廣記卷二十四

欽定四庫全書

史部

輿地廣記卷三十五至

詳校官編修_臣曹城

檢討_臣德生覆勘

總校官降調編修_臣倉聖脉

校對官中書_臣劉圖南

謄錄監生_臣沈景陽

欽定四庫全書

輿地廣記卷二十五

宋 歐陽志 撰

江南西路

都督洪州春秋戰國屬楚秦屬九江郡漢高帝改為淮南國分置豫章郡東漢晉因之東晉置江州初治此後徙尋陽宋齊梁陳皆為豫章郡隋平陳郡廢置洪州大業初州廢復置豫章郡唐武德五年復曰洪州天寶元

年曰豫章郡後升鎮南軍節度皇朝因之今縣八

望南昌縣秦為九江郡南部漢高帝六年置豫章郡其城
即灌嬰所築東漢以後因之後改南昌曰豫章縣隋置洪
州唐武德五年析置南昌鍾陵縣以南昌置孫州八年州
廢省南昌鍾陵實應元年避肅宗諱改豫章曰鍾陵貞元
中又改曰南昌應劭漢官儀曰有豫章生於庭中故以名
郡此木嘗中枯晉永嘉中一旦更茂咸以為中興之祥其
後元帝果興大業於江南故郭璞南郊賦云樊樟擢秀於

固鎮本平固縣吳曰平陽晉太康元年更名屬南康郡
宋因之後省為鎮

望虔化縣漢贛縣地吳置陽都縣晉太康元年改曰寧
都後省焉宋復置大明五年以虔化屯別置虔化縣並
屬南康郡後省虔化入寧都隋平陳改寧都曰虔化屬
虔州唐因之上有梅嶺山漢時閩越反武帝令諸校屯
豫章梅嶺待命閩越發兵入梅嶺殺漢校尉即此縣地
有石鼓山

望興國縣本贛縣地皇朝太平興國八年以險江鎮置興國縣有覆筍山

望信豐縣本南康地唐永淳元年分置南安縣屬虔州天寶元年改為信豐

望雩都縣二漢屬豫章郡晉宋屬南康郡後省隋平陳復置屬虔州唐因之有金雞山云時見金雞出於石上有盤固山

望會昌縣本雩都縣地皇朝太平興國八年以九州鎮

置有君山

望瑞金縣本雩都縣地有金唐天祐元年置瑞金監後升為縣屬虔州有銅鉢山綿上

緊石城縣五代時置屬虔州

上安遠縣唐貞元四年析雩都縣置屬虔州

中龍南縣本漢南野縣地五代時置屬虔州有聶都山山海經曰顓水出聶都山即此

上吉州春秋時百越之地戰國屬楚秦屬九江郡二漢

屬豫章郡興平元年孫策分置廬陵郡吳寶鼎二年孫
皓又置安城郡晉宋齊梁陳皆因之隋平陳二郡俱廢
置吉州大業初復置廬陵郡唐武德五年曰吉州天寶
元年曰廬陵郡皇朝因之今縣八

望廬陵縣二漢屬豫章郡孫策改為石陽縣分置廬陵
郡晉宋因之後改石陽為廬陵縣隋置吉州唐因之有
有玉笥山

望吉水縣本吉陽縣地吳置晉宋屬廬陵郡後省焉皇

朝太平興國九年置吉水縣有仁山吉水

望安福縣本漢安成縣屬長沙國東漢屬長沙郡吳屬
安成郡晉改縣曰安復宋齊梁陳皆因之隋平陳郡廢改
安復縣為安成十八年又曰安復屬吉州唐武德五年改
縣曰安福置潁州七年廢來屬有廬水東至廬陵入潁江
望太和縣吳置西昌東昌二縣晉宋皆屬廬陵郡後西昌
省東昌入焉改為太和縣屬吉州唐因之有潁石山遂興水
望龍泉縣五代時置屬吉州有石含山

望永新縣吳置屬安城郡晉宋因之後省唐武德五年
後置屬南平州八年州廢省入太和顯慶三年復置來
屬有永新山勝業水

望永豐縣本吉水縣地皇朝至和元年以報恩鎮置永
豐縣有雲蓋山報恩江

望萬安縣本龍泉縣地皇朝熙寧四年以萬安鎮置有
龍頭山雲洲

上袁州春秋為百越之地戰國屬楚秦屬九江郡二漢

屬豫章郡吳屬安城郡晉宋齊梁陳因之隋平陳郡廢
置袁州大業初州廢置宜春郡唐武德四年曰袁州天
寶元年曰宜春郡皇朝因之今縣四

望宜春縣二漢屬豫章郡吳屬安城郡晉孝武改為宜
陽宋以後因之隋復改為宜春屬宜春郡唐因之有仰
山袁江有宜春泉醞酒入貢

望分宜縣本宜春縣地皇朝雍熙元年置有鍾山郡國
志云晉永嘉元年因水有大鍾從山上墜水中驗其銘

是秦時樂罷故以名山有昌山

望萍鄉縣吳置屬安城郡晉以後因之隋屬宜春郡唐因之有羅霄山陽岐水

緊萬歲縣本陽樂縣地吳黃武中置晉太康元年改為康樂屬豫章郡宋因之謝靈運襲封康樂公即此後省馬唐武德五年復置陽樂縣屬靖州八年州廢省入高安五代時以其地置萬歲縣屬洪州後屬筠州皇朝開寶八年來屬有康樂故城有謝山康樂水

上撫州春秋時百越之地戰國屬楚秦屬九江郡二漢屬豫章郡吳太平二年分置臨川郡晉以後因之隋平陳郡廢置撫州大業初州廢置臨川郡唐武德五年曰撫州天寶元年曰臨川郡皇朝因之今縣四

望臨川縣本南昌縣地東漢永元八年置臨汝縣屬豫章郡吳孫亮分置臨川郡晉以後因之隋置撫州改臨汝縣為臨川唐因之有峩峩峯山本曰銅山唐天寶中改名臨川水

望崇仁縣本吳置巴丘縣屬廬陵郡置新建縣屬臨川郡晉宋因之梁改巴丘為巴山及置巴山郡隋平陳郡縣俱廢置崇仁縣屬撫州唐因之有崇仁山寶唐水

望宜黃縣唐武德五年析崇仁置屬撫州八年省皇朝開寶八年以宜黃場復置宜黃縣

望金谿縣本臨川縣地皇朝開寶五年以金谿場置有靈秀山金谿水

上筠州自唐以前地理與洪州同南唐李景置筠州皇

朝因之今縣三

望高安縣本建城縣二漢屬豫章郡晉以後因之縣出
然石石色黃白而疎理以水灌之則熱著鼎其上足以
熟物元康中雷煥入洛賁石以示張華華曰此謂然石
於是始識其名隋屬洪州唐武德五年改建城曰高安
置靖州七年改為米州又改為筠州八年州廢屬洪州
南唐復置筠州有飛川鐘口江

望上高縣五代時置屬洪州南唐來屬有八疊山斜口

水

望新昌縣皇朝太平興國三年以高安監步鎮置有黃

蘄山

同下州興國軍五代以前地理與鄂州同皇朝太平興國二年置興國軍今縣三

望永興縣本鄂縣地二漢屬江夏郡孫權改鄂為武昌既而別置陽新縣屬武昌郡晉以後因之江左又析置永興縣隋平陳改陽新曰富川開皇十一年省永興入

馬十八年改富川縣曰永興屬鄂州唐因之皇朝置興國軍有闔閭山吳王闔閭與楚相持屯此

緊大冶縣皇朝乾隆五年以大冶場置屬鄂州太平興國三年來屬有磁湖

中通山縣五代時置屬鄂州皇朝太平興國二年來屬有翠屏山本名石城唐天寶中改名

同下州南安軍自五代以前地理與虔州同皇朝淳化元年置今縣三

中大庾縣唐神龍元年析南康縣置屬虔州皇朝置南安軍有大庾嶺五嶺之最東者亦曰東嶠有橫浦關漢討南越楊僕為樓船將軍出豫章下橫浦是也有涼熱水水經注云連溪出南康縣涼熱山即此水也

望南康縣本漢南野縣地吳分置南安縣晉太康元年改曰南康屬南康郡宋因之改曰贛縣隋大業初復曰南康屬南康郡唐屬河州皇朝淳化元年來屬南黔鎮本南野縣二漢屬豫章郡晉屬廬陵郡宋屬南康郡後

省為鎮有君山章水

上上猶縣五代時置屬虔州皇朝淳化元年來屬有猶水
同下州臨江軍自五代以前地理與筠袁吉三州同皇
朝淳化三年置今縣三

望清口縣五代時置屬洪州南唐屬筠州皇朝置臨江
軍

望新淦縣二漢屬豫章郡晉宋因之隋屬廬陵郡唐屬
吉州皇朝淳化三年來屬有玉笥山淦水

望新喻縣吳分宜春置晉宋屬安成郡隋屬宜春郡唐屬袁州皇朝淳化三年來屬本曰新渝唐天寶後相承作喻有渝水

同下州建昌軍自唐以前地理與撫州同南唐析置建武軍皇朝太平興國四年改名今縣二

望南城縣二漢屬豫章郡晉以後屬臨川郡隋唐屬撫州南唐置軍有麻姑山

望南豐縣吳置屬臨川郡晉宋因之後省唐景雲二年

析南城置屬撫州皇朝淳化二年來屬有軍山

輿地廣記卷二十五

欽定四庫全書

輿地廣記卷二十六

宋 歐陽忞 撰

荆湖南路

上潭州古三苗國之地春秋戰國屬楚秦置長沙郡漢為國東漢復為郡晉屬長沙及衡陽郡永嘉元年兼置湘州宋齊梁陳因之隋平陳郡廢置潭州以昭潭為名大業初州廢置長沙郡唐武德四年曰潭州天寶元年

曰長沙郡升為武安軍節度皇朝因之今縣十一

望長沙縣故青陽地秦始皇二十六年荆王獻青陽以西是也漢為臨湘縣高帝五年以封吳芮為長沙王都此其城即芮所築東漢及晉為郡宋為國齊梁陳為郡隋為潭州唐因之唐宋馬氏父子竊據其地後為南唐所取有嶽麓山昭山山下有旋泉深不可測人以為昭潭無底有湘水瀉水有賈誼宅并仍存

望衡山縣本湘南縣地吳析置衡陽縣及置衡陽郡晉

惠帝改縣曰衡山宋齊梁陳因之隋平陳郡廢屬潭州
唐神龍三年屬衡州皇朝淳化四年來屬禹貢衡山在
西南有三峰曰祝融紫蓋石廩韓愈詩紫蓋連接天
柱石廩騰擲堆祝融有湘水

望安化縣本益陽縣地皇朝熙寧六年置有浮青山資
水

醴陵縣本漢臨湘縣地高后封長沙相越為醴陵侯
即此東漢置醴陵縣屬長沙郡建安八年縣有大山常

鳴如牛响聲積數年後豫章賊攻沒縣亭晉宋皆屬長沙郡後省唐武德四年復置屬潭州有王喬山醴泉上攸縣漢屬長沙國東漢晉宋屬長沙郡後改為攸水隋平陳省入湘潭縣後復置唐武德四年置南雲州貞觀元年州廢屬衡州五代時來屬有雲陽山攸水

中湘鄉縣本湘南縣之湘鄉東漢置縣屬零陵郡晉宋屬衡陽郡後省唐武德四年析衡山置屬潭州有連水歷石魚山下石色黑而理若雲母開發一重輒有魚形

長數寸鱗鱗首尾若刻畫燒之作魚膏腥

中湘潭縣本湘南縣地禹貢衡山在東南湘中記曰衡山有玉牒禹案其文以治水遙望衡山如陣雲沿湘十里九向九背迺不復見漢屬長沙國東漢屬長沙郡晉宋屬衡陽郡後省而置湘潭縣隋屬衡州唐元和後來屬有湘水洧湖

中益陽縣漢屬長沙國東漢晉宋齊梁陳屬長沙郡隋唐屬潭州有浮丘山益水水經注以益水為資水之殊

目縣南十里有平岡岡有井數百淺者四五尺深者不測俗云昔有金人以杖撞地輒便成井

中瀏陽縣本漢臨湘地吳置瀏陽縣屬長沙郡晉宋因之後省唐景龍二年析長沙復置潭州有瀏水

中湘陰縣本羅縣地宋元徽二年分置湘陰縣屬湘東郡齊因之梁置羅州及岳陽郡陳廢州隋平陳郡廢省湘陰入岳陽縣置玉州尋改岳陽為湘陰縣開皇十一年州廢屬岳州唐因之皇朝淳化四年來屬故羅縣羅

國本在襄州宜城之西楚文王徙羅子居此秦為羅縣屬長沙郡二漢晉宋齊因之梁陳屬岳陽郡隋平陳屬岳州唐武德八年省入湘陰故城在今縣東北有湘山湘水汨水出艾縣桓山西逕羅縣北又西逕吳昌縣北東漢置曰漢昌吳更名隋省入羅又西逕玉筍山又西為屈潭楚屈原被讒放逐懷沙自沉於此又逕汨羅城南又西入于湘春秋所謂羅汭也有黃陵水上承太湖西流入湘逕二妃廟南世謂之黃陵廟秦始皇遊至湘

山逢大風問博士曰湘君何神博士對曰堯女舜妻而
葬此始皇大怒使刑徒三千人伐湘山木赭其山焉

中寧鄉縣吳新陽縣地晉太康元年改為新康屬衡陽
郡宋以後因之隋平陳省入益陽縣唐武德四年復置
七年又省皇朝太平興國二年析長沙置有大為山青
陽山為水

上衡州春秋戰國屬楚秦屬長沙郡二漢屬長沙桂陽
二郡吳置湘東衡陽二郡晉宋齊梁陳皆因之隋平陳

省二郡置衡州大業初州廢置衡山郡唐武德四年曰衡州天寶元年曰衡陽郡皇朝因之今縣五

望衡陽縣本酈縣地漢屬長沙國東漢屬長沙郡吳置湘東郡及臨蒸縣東南去酈縣十五里晉因之太元二十年省酈入焉宋齊梁陳因之隋平陳置衡州改臨蒸為衡陽縣唐因之亦漢鍾武縣地屬零陵郡東漢改為重安晉宋以後屬衡陽郡隋省入衡陽縣後復置唐武德七年又省入有岫嶠山即南岳之別名有湘水蒸水

有合江亭韓愈詩江亭枕湘江蒸水會其左有酈湖周
回三里取水為酒極醇美晉武帝平吳始荐酈酒於太
廟

中茶陵縣漢屬長沙國東漢屬長沙郡晉屬湘東郡宋
齊梁陳因之隋省入湘潭縣唐武德四年析攸縣復置
屬南雲州貞觀元年又省聖歷元年復置來屬有雲陽
山茶水漢地理志茶陵有泥水西入湘水經謂之沫水
即今茶水是也茶弋奢反

耒陽縣二漢屬桂陽郡晉宋以後因之隋平陳改曰
耒陰屬衡州唐武德四年復曰耒陽有侯曇山耒水出
郴縣西北過耒陽又北衡陽入湘

中下常寧縣漢分耒陽置新寧縣晉屬湘東郡宋齊梁
陳皆因之隋屬衡州唐天寶元年改曰常寧有逍遙山
湘水宜水

下安仁縣皇朝乾德三年以安仁場置後析衡陽衡山
二縣地入焉

中道州春秋戰國屬楚秦屬長沙郡漢分屬零陵郡東漢晉因之穆帝分置營陽郡宋齊因之梁改為永陽郡隋平陳郡廢屬永州大業初州廢屬零陵郡唐武德四年平蕭銑置營州五年改為南營州貞觀八年改為道州天寶元年曰江華郡皇朝因之今縣四

緊營道縣本漢營浦縣屬零陵郡晉置營陽郡宋齊因之而析置營陽縣為郡治梁改郡縣皆曰永陽隋開皇中郡廢省營浦入永陽屬永州唐武德四年置營州改

永陽為營道縣貞觀八年改營州為道州天寶元年改營道為弘道縣皇朝建隆三年復曰營道有營道山營水出冷道縣西流逕九疑山下又西逕營道又屈而東北逕營涌又北流注于湘亦虞時鼻國之地有象祠唐元和中刺史薛伯高毀之柳宗元作斥鼻亭神記

緊永明縣本漢營浦縣地唐既徙置營道於永陽乃徙置永陽於此屬道州貞觀八年省天授二年復置天寶元年更名皇朝熙寧五年省為鎮入營道元祐二年復

置

緊江華縣漢為乘縣地屬蒼梧郡唐武德四年析置江華縣屬道州貞觀十七年屬永州上元二年復來屬文明元年改曰雲漢神龍元年復故有吳望山沱水

緊寧遠縣漢冷道營道二縣地並屬零陵郡東漢及晉皆因之東晉屬營陽郡宋齊因之梁陳屬永陽郡隋省冷道入營道而徙營道於冷道廢城屬永州唐武德四年徙置營道於永陽縣乃於此地置唐興縣為營州貞

觀八年屬道州長壽二年改曰武盛神龍元年復曰唐
興元寶元年改曰延唐梁改曰延昌後唐復故晉天福
初曰延喜皇朝乾德三年改為寧遠有九疑山虞舜所
葬其山九谿相似故名有冷水出此山北流逕冷道西
南又北流入都溪水故大厯縣本漢冷道之舂陵鄉長
沙定王封其子置是為舂陵節侯後省吳復置屬零陵
郡東晉屬營陽郡宋齊因之梁陳屬永陽郡隋平陳省
入營道唐大厯二年析延唐縣置於舂陵故城北十五

里名曰大厯屬道州皇朝乾德三年省入寧縣有舂陵水卽所謂都溪也西北流入于營水

中永州春秋戰國屬楚秦屬長沙郡漢元鼎六年置零陵郡東漢吳晉宋齊梁陳因之隋開皇初郡廢置永州大業初州廢復置零陵郡唐武德四年平蕭銑置永州天寶元年曰零陵郡皇朝因之今縣三

望零陵縣本漢泉陵縣屬零陵縣東漢為郡治晉宋齊梁陳因之隋置永州改泉陵為零陵縣唐因之泉陵故

城在今縣北二里亦晉應陽縣地惠帝分觀陽置屬零陵郡宋齊梁陳因之隋省入零陵縣應水東南流入湘有臯墟象之所封也有萬石山瀟湘水縣有香茅自古貢之禹貢荊州菁茅也

中祁陽縣吳分泉陵置屬零陵郡晉宋齊梁陳因之隋省入零陵縣唐武德四年復置屬永州亦吳永昌縣地晉宋齊梁陳屬零陵郡隋省入零陵縣後分入祁陽有石燕山石色紺而狀似燕或大或小若母子及雷風相

薄則羣飛頡頏有湘水

中東安縣皇朝雍正元年以零陵縣之東安場置

中郴州春秋戰國屬楚秦屬長沙郡項羽尊楚懷王為

義帝都郴漢高帝二年置桂陽郡東漢晉宋齊梁陳因

之隋開皇中平陳郡廢置郴州大業初州廢復置桂陽

郡唐武德四年平蕭銑置郴州天寶元曰桂陽郡皇朝

因之今縣四

縣郴縣義帝所都項羽使英布害之縣南有義帝冢漢

屬桂陽郡東漢以後因之隋置郴州唐因之有靈壽山
古所謂萬歲也有石室室有鍾乳上悉生靈壽木下有
千秋溪又有淥水出縣東侯公山西北流而南屈注于
來謂之程鄉溪昔置酒宮醴醕于山下名曰程酒獻同
酈酒焉

中桂陽縣漢郴縣地東晉分置汝城縣屬桂陽郡宋齊
梁因之陳改為廬陽縣及置廬陽郡隋平陳郡廢以縣
屬郴州唐天寶元年改為義昌後唐改曰郴義皇朝太

平興國元年改為杜陽有耒山耒水所出西北流逕汝城縣北又西北逕晉寧縣北又北過郴縣西又北過便縣西又西北過耒陽縣東又北過酃縣東又西北至臨烝而右注湘水

中宜章縣隋大業末蕭銑析郴置義章縣屬郴州唐因之皇朝太平興國元年改曰宜章亦二漢臨武縣地屬桂陽郡晉宋齊梁陳因之隋唐屬郴州後廢有武溪南入樂昌有嵐嶺

中永興縣漢便縣屬桂陽郡東溪吳晉因之宋省焉唐
開元十三年置安陵縣屬郴州天寶元年改為高亭皇
朝熙寧六年改為永興有高亭山安陵山

中邵州春秋戰國屬楚秦屬長沙郡二漢屬長沙零陵
二郡吳寶鼎元年分置邵陵郡晉宋齊梁陳因之隋平
陳郡廢屬湘州唐武德四年平蕭銑置南梁州貞觀十
年改為邵州天寶元年曰邵陽郡皇朝因之今縣三

望邵陽縣漢曰昭陵屬長沙郡吳置邵陵郡晉改縣曰

邵陵宋因之後省入邵陽邵陽本昭陽東漢置屬零陵郡晉武帝改焉屬邵陵郡宋因之後併邵陵入而以邵陽為郡治隋郡廢屬湘州唐武德四年復置邵陵縣七年省入邵陽後置邵州又吳置高平縣屬邵陵郡晉宋因之後省入邵陽有文斤水邵陵水

望新化縣皇朝收復梅山以其地置新化縣屬邵州有長龍山瀆水

下蒔竹縣皇朝元豐四年以洞溪徽州置蒔竹縣屬邵

州有九龍山時竹水

下全州自後唐以前地理與永州同石晉天福三年楚王馬希範奏置全川皇朝因之今縣二

望清湘縣漢零陵洮陽二縣地並屬零陵郡東漢晉宋齊梁陳皆因之隋置省而置湘源縣屬永州唐因之後改為湘川楚又改為清湘而置全州有湘山宜湘水漢洮陽故城在今縣西北零陵故城在南

觀陽縣漢零陵縣地吳分置觀陽屬零陵郡晉宋齊梁

陳皆因之隋省入湘源縣大業末蕭銑復置屬永州唐武德七年省上元二年復置石晉時來屬有灌水

同下州武國軍自五代以前地理與邵州同皇朝因之

中武岡縣二漢都梁縣地屬零陵郡晉武帝分置武岡縣屬零陵郡宋因之後省入都梁縣隋又省都梁入邵陽縣後復置曰武攸唐武德四年改為武岡屬南梁州後屬邵州皇朝置武岡軍縣左右一岡對峙重岨齊秀間可二

里舊傳東漢伐五溪蠻蠻保此岡故曰武岡亦二漢夫夷縣地屬零陵郡吳屬邵陵郡晉宋齊梁陳皆因之隋省入邵陽唐分屬武岡故城在縣東北晉武帝置建興縣屬邵陽郡晉宋因之後省焉唐武德四年復置七年省入武岡有唐糾山濱水所出

同下州桂陽監自五代以前地理與郴州同後置桂陽監皇朝因之今縣二

上平陽縣按舊唐史志云晉分郴置平陽縣陳廢蕭銑

復置唐武德七年省八年復置郴州然晉宋二志皆無
縣五代時廢馬皇朝天禧元年復置桂陽監治此有大
湊山靈星江

中藍山縣本二漢南平縣屬桂陽郡晉宋因之後省唐
咸亨二年復置屬郴州天寶元年改為藍山皇朝景德
元年來屬有藍山

輿地廣記卷二十六

欽定四庫全書

輿地廣記卷二十七

宋 歐陽志 撰

閩

在今縣西故得江夏之名春秋時謂之夏汭後世謂之夏口亦謂之魯口歷代常為重鎮梁武帝自襄陽起兵進逼郢城有數百毛人踰堞且泣因投黃鵠磯蓋城之精也明旦城降有黃鵠山鸚鵡洲

望崇陽縣唐天寶二年開山洞置唐年縣屬鄂州朱梁改為臨夏後唐復故名石晉天福初改為臨江皇朝開寶八年改為崇陽

上武昌縣故楚之東鄂也楚子熊渠封中子紅為鄂王二

漢鄂縣屬江夏郡吳孫權都之皇初三年改為武昌縣及置江夏郡黃龍元年遷都建業以陸遜輔太子鎮武昌孫皓亦嘗都此及東遷使滕牧守之晉太康元年改江夏郡曰武昌郡永平中始置江州傳綜為刺史治此東晉時庾亮謝尚亦鎮焉宋齊梁陳皆為武昌郡隋屬鄂州唐因之故西陵縣二漢屬江夏郡魏屬弋陽郡晉憲帝分屬西陽國宋因之陳省入武昌有樊山崢嶸洲晉劉毅破桓玄於此中蒲圻縣晉太康元年置屬長沙郡宋元嘉十六年屬

巴陵郡孝建元年屬江夏郡梁置上雋郡隋平陳郡廢屬鄂州唐因之有赤壁山漢末孫權遣周瑜與劉備併力敗曹公於此有蒲圻湖

中咸孚縣五代時置永安縣屬鄂州皇朝景德四年改今名有鍾臺山牛臯潭

中通城縣本崇陽縣地皇朝熙寧五年升通城鎮為縣有九嶺山鷄鳴山太平港

下嘉魚縣晉沙陽縣地屬武昌郡宋元嘉十六年屬巴

陽郡孝建元年屬江夏郡梁置沙州尋廢隋省沙陽入蒲圻五代時置嘉魚縣屬鄂州有魚嶽山左大江中

中安州春秋戰國屬楚秦屬南郡漢高帝置江夏郡東漢晉因之宋孝建元年分置安陸郡齊因之梁置南司州尋罷西魏置安州總管府隋開皇初郡廢十四年府廢大業初復置安陸郡唐武德四年平王世充改為安州天寶元年復曰安陸郡後唐升安遠軍節度皇朝因之今縣五年

中安陸縣漢屬江夏郡晉為郡治宋置安陸郡梁置南司州

西魏置安州隋唐因之漢江夏郡故城在東南有禹漢陪尾
山石巖山晉張昌作亂山下鎮南將軍劉弘擊斬之有湏水
東南入沔有雲夢澤然楚之雲夢跨江南北非止此而已

中雲夢縣西魏置隋屬安州唐因之皇朝寧熙二年省
入安陸元祐元年復置按漢地理志西陵縣為江夏郡
治而有雲夢官疑此地是也

中應城縣漢雲杜縣地西魏置隋大業初改曰應陽屬
安陸郡唐武德四年復曰應城屬安州元祐三年省入

雲夢大和二年復置天祐二年復曰應陽後唐復故有
沒河水出大洪山東流入於潁有溫泉水出京山東澤
中淵靜如鑑聞人聲則湯湯奮發其熱可以燂鷄東南
流注於潁有蒲騷城左傳郢人軍於蒲騷是也

中孝感縣本孝昌縣宋孝武帝置屬江夏郡西魏置岳
州及岳山郡後周並廢又有潏岳郡隋開皇初廢以縣
屬安州唐武德四年置潏州及潏陽縣八年州廢省潏
陽入孝昌宋屬元和三年省入雲夢咸通中復置後唐

改為孝感有潯河鎮九宗山

中下應山縣本東漢平春縣地屬江夏郡晉因之宋屬義陽郡後省梁置永陽縣及應州隋大業初州廢改永陽為應山屬安陸郡唐屬安州有大龜山石龍山潯水按水經潯水出江夏平春縣西南過安陸入於潯

上復州春秋戰國屬楚秦屬南郡二漢屬南江夏二郡晉元康元年分置竟陵郡宋齊因之梁又置沔陽郡後周置復州隋因之而郡廢大業初州廢復置沔陽郡唐

武德五年改為復州天寶元年又曰竟陵郡石晉天福初
改曰景陵郡皇朝因之熙寧六年州廢後復置今縣三
緊景陵縣楚封大夫鬬辛於此是為鄖公戰國秦使白
起攻楚拔郢東至竟陵二漢屬江夏郡晉置竟陵郡後
省入霄城後周復改霄城為竟陵隋開皇初州自建興
移治此仁壽三年州仍治建興貞觀七年徙沔陽陽五
代時又徙治此皇朝熙寧六年州廢屬安州後復置來
屬有巾水戍山晉元熙三年竟陵郡言巾水戍山得古

銅鐘七枚藏於相府有漢水夏水

下沔陽縣春秋鄖子之國漢雲杜縣地屬江夏郡東漢
晉因之宋屬竟陵郡後省梁置沔陽郡西魏省州陵惠
懷二縣置縣曰建興後周置後州隋開皇初州移治竟
陵仁壽二年州仍治建興大業初改建興曰沔陽州廢
仍置沔陽郡唐武德中屬復州貞觀七年州徙治此五
代時又徙治景陵皇朝熙寧七年省入監利後復置來
屬雲杜城在縣西北又有石城在西南西臨沔水因山

為固晉杜預為荊州刺史開陽口達巴陵徑千餘里內
避長江之險通零桂之清即此惠帝始置竟陵郡治此
下玉沙縣皇朝乾德三年以白沙院置屬江陵府至道
三年來屬熙寧六年省入監利元祐元年復置按唐地
理志郢州富水有白沙山白沙水所出而水經言江水
過下隲東得白沙口謂白沙水入江處也然則白沙院
之取名蓋以水所經矣

上鼎州春秋戰國皆屬楚秦屬黔中郡漢屬武陵郡東

漢晉宋齊皆因之梁置武州後改曰流州隋平陳郡廢
改州曰朗州大業初州廢復置武陵郡唐武德四年平
蕭銑置朗州天寶元曰復曰武陵郡皇朝因之大中祥
符五年改曰鼎州今縣三

望武陵縣本漢臨沅縣屬武陵郡東漢為郡治晉宋齊
梁陳皆因之晉趙欽問潘京曰貴郡何以名武陵京云
鄙郡本名義陵郡在辰陽縣界與夷相接數為此敗光
武移東出共議易號傳曰止戈為武詩稱高平曰陸隋

廢郡置朗州改臨沅為武陵縣唐因之皇朝改曰鼎州
故漢壽縣本名索漢為武陵郡治東漢陽嘉三年更名
為荊州刺史治而郡徙治臨沅至魏州徙治江陵長改
漢壽為吳壽晉復故宋齊梁陳皆因之隋省入武陵有
武陵山

原闕

山上有善卷壇有沅水鼎水枉渚

望桃源縣東漢沅南縣地建武二十六年置屬武陵郡
晉宋齊梁陳皆因之隋省入武陵皇朝乾德元年析武
陵置桃源縣有桃源山晉陶潛桃源記晉太元末有漁

人深入武陵溪見桃花夾岸居人衣冠皆秦製自言避秦隱居數世矣不知朝市之變漁人既出後再尋之路迷終不能至有沅水

中龍陽縣吳置晉宋齊梁陳皆屬武陵郡隋唐屬朗州有龍陽山零水有龍陽州吳李衡植柑於其上臨死謂其子曰吾洲有木奴千頭不責衣食歲絹千疋後柑成果如言

上澧州春秋戰國皆屬楚秦屬黔中郡二漢屬武陵郡

吳孫休永安六年分置天門郡晉末以後因之隋平陳
郡廢置松州尋改為澧州大業初置澧陽郡唐武德四
年平蕭銑置澧州天寶元年曰澧場郡皇朝因之今縣
四

望澧陽縣晉太康四年置屬天門郡宋因之後省焉隋
復置及置澧州太業初置澧陽郡唐為澧州有大浮山
崇山昔舜放驩兜於此有澧水涔水涔東南流入澧

中下安鄉縣東漢作唐縣地後置安鄉縣隋屬澧州唐

因之作唐縣東漢分孱陵置屬武陵郡晉置南平郡宋
齊梁陳皆因之隋開皇中郡廢改作唐為孱陵屬澧州
唐貞觀元年省入安鄉亦漢壽縣地有澧水澹水按水
經注澧水東逕安南縣南澹水注之水上承澧水於作
唐東逕其縣北又東注於澧謂之澹口龍王仲宣詩所
謂悠悠澹澧是也

中下石門縣漢零陽縣地吳時武陵充縣松梁山有石
洞開廣數十丈其高似弩仰射不至名曰天門孫休以

為佳祥置天門郡於此晉宋齊梁陳皆因之隋開皇中
郡廢置石門縣屬澧州唐因之有層山水經注所謂澧
水東歷層步山是也有淩水淙水東注澧水謂之淙口
下慈利縣二漢零陵縣屬武陵郡晉宋屬天門郡後省
隋開皇中復置屬澧州十八年改曰慈利唐因之亦淩
中縣地吳置晉宋屬天門郡後省亦崇義縣地後周置
衡州隋開皇中置縣十八年改州曰崇州大業初州廢
屬澧陽郡唐屬澧州麟德元年省入慈利有九度山澧

水

中峽州春秋戰國屬楚秦二漢屬南郡魏武平荊州分
置臨江郡劉備改為宜都郡吳晉齊宋梁皆因之兼置
宜州西魏改曰柘州後周改曰硤州隋開皇七年郡廢
大業初州廢置夷陵郡唐武德二年復為硤州天寶元
年曰夷陵郡皇朝因之今縣四

中夷陵縣夷山在西北縣以為名秦令白起代楚三戰
而燒夷陵即此二漢屬南郡建安十五年劉備以屬宜

都郡吳黃武元年改曰西陵以為重鎮郡城陸坑所築也晉太康元年復故名宋齊梁陳皆因之隋置夷陵郡唐置硤州已出塞本巴山縣隋分長陽置屬清江郡後省唐武德四年復置屬睦州八年屬東松州貞觀元年屬硤州天寶八載省入長陽五代時復置皇朝開寶八年省入夷陵有西陵山虎牙山石壁色紅間有白文類牙形焉有黃牛硤南岸高崖間有石如人牽牛狀人黑牛黃此巖既高加以江湍紆迴行者謠曰朝發黃牛暮

宿黃牛三朝一暮黃牛如故

中宜都縣二漢夷道縣地屬南郡劉備置宜都郡晉宋
齊梁皆因之又析夷道置宜昌縣隋開皇七年郡廢宜
昌屬江陵府大業初夷道屬夷陵郡唐武德二年改宜
昌為宜都以宜都及夷道置江州六年曰東松州貞觀
元年州廢省夷道入宜都來屬有荆門山上合下開通
徹山南有門象馬大江東歷荆門虎牙二山之間荆門
在南虎牙在北為楚之西塞故即璞江賦曰虎牙築起

以屹萃荆門關竦而盤薄圓淵九回以高騰溢流雷响而電激也東漢建武中岑彭擊荆門破公孫述將任滿田戎於此有勾將山夷水自施州東北流至縣北注大江即清江水也

中下長陽縣本佷山漢屬武陵郡東漢屬南郡晉屬宜都郡太康元年改為興山後復故宋因之後改為長陽隋屬江陵府唐武德四年置睦州八年州廢屬東松州貞觀元年州廢來屬故鹽水縣後周置及立亭州資曰

郡隋開皇初郡廢大業初改州為庸州又廢為清江郡
後郡徙而縣省唐武德四年復置為睦州八年省入長
陽昔巴蠻廩君乘土舡徙夷水下至鹽陽射殺神女又
下及夷城而居之蓋此地也有佷山出藥草恒山世以
銀為音有長陽溪出射堂村東六七里谷中有石穴清
泉潰流三十許步復入穴其水重源顯發北流注於夷
水

中下遠安縣本東晉沮陽縣地義熙初分置高安縣及

汝陽郡後周改縣曰遠安隋開皇七年郡廢屬峽州唐
因之有沮水東南流逕當陽枝江縣入於江謂之沮口

輿地廣記卷二十七

欽定四庫全書

輿地廣記卷二十八

宋 歐陽忞 撰

荆湖北路

下岳州古三苗國地春秋戰國屬楚秦屬長沙郡二漢因之晉元康元年置建昌郡咸康元年省宋元嘉十六年置巴陵郡齊梁陳皆因之梁兼置巴州隋平陳郡廢改州為岳州大業初改曰羅州復置巴陵郡唐武德四

年平蕭銑置巴州六年改為岳州天寶元年曰巴陵郡
皇朝因之今縣五

上巴陵縣二漢下雋縣地吳為巴丘郎閤晉太康元年
置巴陵縣屬長沙郡宋置巴陵郡梁置巴州隋改為岳
州唐因之吳使魯肅方或東晉使陶侃皆守巴陵以為
重鎮有大江洞庭湖有資水沅水澧水湘水同注洞庭北
會大江名之五渚戰國策云秦與荆戰大破之取洞庭
五渚謂此地湖水圓廣五百餘里日月若出沒於其地

有君山陂山巴即湘山也以湘君之所迹處因曰君山
有石穴與太湖之苞山潛通故太湖亦有洞庭山君山
東北對陂山兩山相次去數千里回峙相望孤影若浮
有青草湖

望華容縣漢孱陸縣地晉武帝時置安南縣屬安平郡
宋因之隋開皇十八年改曰華容屬岳州唐因之垂拱
二年更名容城神龍元年復故有方臺山赤亭湖近湖
有赤亭城梁元帝使胡僧祐陸法和等據赤亭擊破侯

景軍擒其將往約即此

上平江縣本漢昌縣地東漢置吳曰吳昌晉宋因之屬
長沙郡隋平陳省入羅唐省羅入湘陰神龍三年分湘
陰置昌江縣屬岳州後唐改曰平江有汨水西至湘陰
入湘有蘆水

中臨湘縣本巴陵縣之王朝塲皇朝淳化四年升為王朝
縣至道二年改為臨湘有陵城山大江

中沅江縣漢益陽縣地梁置樂山郡及樂山縣隋平陳

郡廢改縣曰安樂屬岳州十八年改曰沅江唐因之乾
寧中改曰橋江五代時屬朗州皇朝乾德元年復曰沅江
來屬有楓山沅水

下歸州春秋為夔子國楚人滅之及戰國皆屬楚秦屬
南郡二漢因之吳永安三年置建平郡晉亦為建平郡
宋因之後周置秭歸郡隋開皇初郡廢屬信州大業初
屬巴東郡唐武德二年分夔州置歸天寶九年曰巴東
郡皇朝因之今縣三

下秭歸縣故夔子國其先熊摯本楚之嫡嗣以疾不立而封於夔春秋時夔子不祀祝融與鬻熊曰我先君有疾鬼神弗赦而自竄於夔我是以失楚又何祀焉楚人滅之二漢為秭歸縣屬南郡晉宋屬建平郡其地險固孫皓末晉將王濬有蜀泐江伐吳吳守將吾彥表謂皓曰增建平兵若建平不下晉師終不敢過皓不從即秭歸縣界後周置秭歸郡隋郡廢屬信州唐置歸州縣東南有外陽城周成王封楚子熊繹始居於此後徙都枝

江亦曰丹陽縣北百餘里有楚大夫屈原故宅名曰樂
平里原既被流放忽然暫歸有賢姊曰女須亦歸喻令
自寬離騷所謂女須之嬋媛兮申申其詈予也袁山松
以為秭歸之名始於此而酈道元引樂緯云昔歸典聲
律宋忠注云歸即夔也則知古人通音同字不必因屈
原也有空舫峽大江

下巴東縣漢巫陽縣地宋有歸鄉縣屬建平郡初在秭
歸之東後徙置於此梁置信陵郡後周郡廢改歸鄉曰

樂鄉隋開皇末又改曰巴東屬信州唐武德二年來屬
有石門山在大江北岸洞達東西劉備為陸遜所破走
逕北門追者甚急踰山越險僅乃得免遂發憤而薨
下興山縣吳置屬建平郡晉因之宋省焉唐武德三年
析秭歸復置屬歸州皇朝熙寧五年省入秭歸後復置
有古夔子城有昭君村漢宮女王嬙此鄉人也

下辰州古蠻夷地春秋戰國屬楚秦昭襄王三十年取
楚巫黔及江南地置黔中郡漢高帝二年改為義陵郡

在辰陽縣界與蠻夷相接數為所攻破光武時郡治東徙臨沅遂改為武陵郡而以此地屬焉晉宋齊因之後置沅陵郡隋平陳郡廢置辰州大業初州廢復沅陵郡唐武德四年平蕭銑置辰州天寶元年曰盧溪郡皇朝因之今縣四

中沅陵縣二漢晉宋齊皆屬武陵郡後置沅陵郡隋置辰州唐因之縣東有壺頭山高一百里圓廣三百里東漢馬援征蠻從壺頭進軍遇瘴沒於此有小西山沅水

酉水其水東南注于沅謂之酉口

中下淑浦縣本漢義陵縣屬武陵郡東漢省之唐武德五年分辰溪地置淑浦縣屬辰州有淑溪其水出鄜梁山西北注于沅楚詞所謂入淑浦余邇廻兮迷不知吾之所如即此水也最為沃壤特宜稻焉其城則劉備所築

下辰溪縣二漢辰陽縣屬武陵郡晉省之宋復置屬武陵隋平陳改曰辰溪屬兖州大業初州廢屬沅陵郡唐

屬辰州有五城山辰溪縣治舊在辰水之北楚詞所謂夕宿辰陽是也

下盧溪縣本沅陵縣地唐武德三年析置盧溪縣屬辰州有武山武溪所出東南流注于沅水源石上有磐瓠跡猶存磐瓠者高辛氏之狗銜犬戎吳將軍頭致於闕下帝妻以少女磐瓠負女入南山上石室中生六男六女自相夫妻後遂滋蔓今五溪蠻夷即其種也

下沅州古蠻夷地春秋戰國皆屬楚秦屬黔中郡二漢

晉宋屬武陵郡梁陳屬沅陵郡隋屬辰州唐貞觀八年以辰州之龍標縣置巫州天授二年曰沅州開元十三年以沅原聲相近復曰巫州天寶二年曰潭陽郡大歷五年改為叙州唐衰沒于溪洞皇朝熙寧七年收復置沅州兼得錦獎二州之地今縣三

下廬陽縣本漢無陽縣地屬武陵郡東漢省之晉宋為舞陽後省梁置龍標縣屬沅陵郡隋屬辰州唐析龍標置潭陽縣屬叙州皇朝熙寧七年以其地置廬陽縣為

沅州治焉鎮江浦本龍標縣地唐置叙州熙寧五年以其地置寨元豐三年廢為鋪龍門鋪本龍門縣地唐垂拱四年析麻陽置屬辰州尋省熙寧七年以其地置鋪獎州鋪唐獎州地也

下麻陽縣唐武德三年分沅陵辰溪置屬辰州熙寧七年來屬唐招諭縣垂拱三年置屬錦州後省皇朝太平興國七年析麻陽復置屬辰州熙寧七年來屬八年省入麻陽故錦州寨唐錦州地也有辰山辰溪

下黔陽縣本鐔城縣地二漢及晉屬武陵郡宋省焉唐貞觀八年置朗溪縣屬叙州後置黔江城皇朝元豐三年升為黔陽縣有紫霄山七寶山沅水舞水

下靖州古蠻夷地唐為溪洞誠州皇朝熙寧九年收復仍置元祐二年廢為渠陽軍三年廢為寨屬沅州紹聖中復置誠州崇寧二年改為靖州今縣三

下永平縣本沅州貫保寨地皇朝元豐六年置渠陽縣為誠州治崇寧二年改為永平有勝山渠河

會同縣本三江崇寧二年改名

通道縣本羅蒙崇寧二年改名

同下州漢陽軍春秋屬鄖後及戰國屬楚秦屬南郡二
漢屬江夏郡晉宋齊因之梁屬沔陽郡後周屬復州隋
屬沔州州廢屬沔陽郡唐武德四年平朱粲置沔州建
中二年州廢四年復置寶歷二年州又廢屬鄂州周置
漢陽軍皇朝因之熙寧四年軍廢屬鄂州元祐元年復
置今縣三

望漢陽縣本安陸縣地二漢及晉屬江夏郡東晉置沌陽縣宋因之後省隋開皇十七年置漢津縣屬復州大業初改曰漢陽唐屬沔州州廢屬鄂州周置漢陽軍皇朝因之有魯山大江漢水沌水澠水漢入江處謂之沔口漢末魏及吳人皆以為重鎮禹貢漢水至于大別南入于江今縣蓋古大別之地也

下漢川縣本安陸縣地梁置梁安郡西魏改曰魏安郡尋改曰漢川郡隋開皇初郡廢唐武德四年析漢陽置漢

川縣屬沔州州廢屬鄂州周屬安州皇朝太平興國二年改曰漢川屬漢陽軍亦周隋甑山縣也

同下州荆門軍五代以前地理與江陵府同皇朝開寶五年置荆門軍熙寧六年廢元祐元年復置今縣二

中長林縣本編縣地二漢晉宋皆屬南郡後廢焉而置

長林長寧二縣隋開皇十一年省長林入長寧十八年改長寧曰長林屬江陵府唐武德四年於縣東北置基州及章山縣七年州廢以章山隸郢州郢州廢來屬八

年省入長林貞元二十一年析置荊門縣後省皇朝置
荊門軍軍廢屬江陵府後復置皆為軍治有章山禹貢
所謂內方也有漢水漳水漕水

下當陽縣二漢晉宋齊梁屬南郡後周置平州屬梁蕃
隋開皇七年改為玉州九年州廢屬江陵府梁又置安
居縣十八年改曰昭丘大業初改曰荊臺尋省入當陽
唐武德四年復置平州六年改曰玉州八年州廢屬荆
州皇朝置荊門軍初治此後徙治長林軍廢屬江陵府

後復置來屬二漢臨沮縣屬南郡晉屬襄陽郡宋復屬
南郡後省唐武德四年析當陽復置屬平州八年省入
當陽縣有綠林山在縣東即所謂當陽長阪也曹公追
劉備而張飛橫矛拒之於此有麥城關侯保麥城詐降
而遁焉為潘璋所斬有沮水漳水皆東南流入于江而
麥城在二水間王粲於此登樓而賦之曰夾清漳之通
浦倚曲沮之長洲是也

荆湖北路化外州

下錦州歷代地理與辰州同唐垂拱二年析辰州麻陽縣地及開山洞置錦州天寶元年改為盧陽郡乾元元年復曰錦州統縣五

中下盧陽縣

中下渭陽縣

中下招諭縣本省入沅州麻陽

中下常豐縣本萬安縣天寶元年更名

中下洛浦縣天授二年析辰州之大鄉置屬溪州後來屬

下巽州歷代地理與辰州同唐天授二年析沅州之夜
郎渭溪二縣置舞州開元十三年以舞武聲相近更名
鶴州二十年曰業州天寶元年曰龍溪郡大厯五年改
為巽州統縣三

中下峩山縣本夜郎天寶元年更名

中下渭溪縣天授二年析夜郎置

中下梓潼縣本屬充州天寶二年廢為羈縻州以縣來
屬

下溪州歷代地理與辰州同唐天授二年析辰州之沅鄉置天寶元年曰靈溪郡統縣二

上大鄉縣漢沅陵零陽二縣地屬武陵郡梁置大鄉縣屬沅陵郡隋屬辰州唐置溪州以王溪相會此地故以
為名

中下三亭縣貞觀九年析大鄉置有黔山大酉山

輿地廣記卷二十八

欽定四庫全書

輿地廣記卷二十九

宋 歐陽忞 撰

成都府

次府成都府自三代以前為蜀國其君曰蠶叢曰伯雍
曰魚鳧曰杜宇曰開明相繼王之周武王伐商蜀人從
焉牧誓所謂庸蜀是也秦惠王時巴蜀相攻惠王乃使
張儀司馬錯等伐蜀取之置蜀郡西漢因之蜀王本治

廣都樊鄉儀既平蜀乃自赤里街移治於少城儀所築也謂之龜城至昭王時李冰為蜀守穿二江行成都中以灌漑土田蜀由此為沃野蜀人始未知學漢景帝時文翁為蜀守乃立學宮教民以經術文藝於是蜀之學者比齊魯焉武帝置益州以統之王莽敗公孫述據蜀光武遣吳漢討平之亦為蜀郡東漢末劉焉為益州牧始自廣漢之雒移治於成都其子璋為劉備所取據其地魏咸熙中遣鄧艾伐取之晉武帝改為成都國尋復

置蜀郡魚為益州刺史治惠帝之末李特僭號於蜀後
桓溫滅之其地復為晉有安帝時譙縱又竊據之為朱
齡石所滅宋及齊梁皆因晉舊後周令尉遲迥克而有
之州郡復因梁馬隋開皇初郡廢大業初復置唐武德
初改為益州天寶元年又改為蜀郡十五載明皇幸蜀
駐蹕成都至德二年駕迴秦京乃改蜀郡為成都府又
分為劍南西川節度唐末王建據之而滅於後唐孟知
祥又據之皇朝乾德三年王師克蜀太平興國六年降

為益州端拱元年復升成都府劍南西川淳化五年復為益州嘉祐四年復升為府六年復為劍南西川今縣九次亦成都縣在府西古蜀國也秦既平蜀張儀築成都以象咸陽為蜀郡治西漢因之漢末又為益州刺史治焉晉宋齊梁陳皆因之唐為成都府治成都舊謂之錦官城言官之所織錦也亦猶合浦之珠官云又或名之曰錦里城北有升仙橋蜀人司馬相如將入長安題其柱曰不乘高車駟馬不過汝下後奉使歸蜀果如志焉

李冰泚水造橋上應七星曰冲理橋曰市橋曰江橋曰萬里橋曰笮橋曰永平橋曰長升橋吳漢伐公孫述光武謂漢曰安軍宜在七星間蓋謂是也沱江鎮以沱水之山經為名禹貢言岷山導江東別為沱而爾雅亦言江有沱凡江之別出者皆曰沱非獨此有之故禹治水於荊州之域亦曰浮于江沱潛漢也武擔山蜀王紀云武擔山精化為女子蜀王納以為妃妃死王憐之令五丁力士擔土於成都為冢以葬妃故曰武擔今山上有

石照存焉

次赤華陽縣在府城東本成都縣地唐貞觀十七年析置蜀縣乾元元年更名華陽昔人論蜀之繁富曰地稱天府原號華陽故晉常璩作蜀書誦之華陽國志縣之得名實本諸此府學有石室漢蜀守文翁興學校人作石室以奉祠之

次畿新都縣漢舊縣也故城在今縣東屬廣漢郡晉置新都郡於雒而以縣屬焉隋開皇十八年改新都縣曰

興樂大業初省興樂入成都唐武德二年復置新都縣
屬益州

次畿郫縣漢舊縣也故城在今縣北屬蜀郡宋晉齊梁
周隋皆因之唐屬益州蜀王杜宇號曰望帝都郫有墓
在焉犀浦鎮本成都縣地唐垂拱二年析置犀浦縣屬
益州秦時李冰作石犀五以厭水精穿石犀渠於南江
命之曰犀牛里縣取此以為名耳不在其地也皇朝熙
寧五年省為鎮入郫縣

次畿雙流縣本漢廣都縣後置寧蜀郡後周郡廢屬蜀
郡隋仁壽元年以太子名廣故改曰雙流唐屬益州秦
時李冰穿二江行成都中故左思蜀都賦云帶二江之
雙流按外江在今羅城之南笮橋下內江在今子城之
南衆安橋下自唐乾符中高駢作羅城遂作廩棗堰轉
內江水從城北流又屈而南與外江水合故今子城之
南不復成江然則二江雙流未嘗歷此縣之境特取蜀
中事而名之耳

次畿溫江縣本郫縣地西魏析置溫江縣隋開皇初省入郫仁壽初復置萬春縣大業初又省唐武德三年復置萬春縣屬益州貞觀元年更名溫江有新源水開元二十三年長史章仇兼瓊因蜀王秀故渠益開通之以漕西山竹木

次畿新繁縣漢曰繁縣屬蜀郡晉因之唐為新繁屬益州

次畿廣都縣本漢舊縣地隋改廣都曰雙流唐龍朔二

年又析雙流置廣都縣屬益州

次畿靈泉縣本漢成都縣地唐貞觀元年析蜀縣置東陽縣屬益州天寶元年更名靈池皇朝天聖四年改曰靈泉

上眉州秦屬蜀郡漢屬犍為郡晉宋皆因之齊置齊通郡梁及後周皆因之隋開皇初廢齊通入眉山郡唐武德二年析嘉州置眉州天寶元年改為通義郡後復為眉州皇朝因之統縣四

望眉山縣本漢武陽縣地後分置齊通縣為齊通郡治
梁及後周皆因之隋開皇初郡廢改齊通曰廣通仁壽
元年改為通義唐置眉州皇朝太平興國二年改為眉
山按西魏置眉州隋置眉山郡皆在今嘉州其後州縣
之名遷於此耳

望彭山縣本漢武陽縣屬犍為郡東漢為郡治焉晉因
之後郡遷於犍道乃改武陽為犍為縣置江州西魏改
縣曰隆山以縣有鼎臯山地形隆起故也後周省州置

隆山郡隋開皇初屬陵州唐貞觀元年省隆山入通義
二年復置來屬先天元年改為彭山取彭女山為名有
彭亡聚相傳彭祖亡於此後漢岑彭伐公孫述次其地
惡之會夜不及徙營果為述刺客所殺黃龍鎮在赤水
口漢末黃龍見于武陽赤水劉先主以為受命之祥
望丹稜縣南齊置齊樂縣後周因之隋開皇初改曰丹
稜屬嘉州唐武德二年來屬

望青神縣本漢南安縣地後周置青神縣及青神郡隋

開皇初郡廢屬嘉州唐武德二年來屬舊治思濛水口
八年移於今治昔蠶叢氏衣青衣以勸農桑縣蓋取此
為名

望蜀州秦二漢屬蜀郡晉永和中桓溫平蜀置晉原郡
宋齊屬晉康郡後周廢隋屬蜀郡唐垂拱二年析置蜀
州天寶元年曰唐安郡皇朝因之今縣四

望晉原縣本漢江原縣屬蜀郡李雄據蜀置江原郡桓
溫克之置晉原郡縣為多融後周郡廢改縣為晉原隋

屬蜀郡唐垂拱二年置蜀州

望新津縣本漢武陽縣地後周置新津縣以為犍為郡
治焉隋開皇初郡廢屬蜀郡唐垂拱二年來屬有天柱山
通齊堰自邛江口引渠南下百二十里至眉州西南入
江溉田千六百頃唐開元二十八年採訪使章仇兼瓊
開

望江原縣本漢江原縣地後魏置熒通縣大業初省入
新津唐武德二年復置唐隆縣屬益州垂拱二年來屬

長壽二年改曰武隆神龍元年復曰唐隆先天元年更名唐安後又曰唐興皇朝開寶四年改唐興曰江原望永康縣本青城縣之橫渠鎮孟蜀廣政中置永康縣屬蜀州有天國山

望彭州秦二漢及晉屬蜀郡桓溫平蜀置寧蜀郡梁置東益州西魏置天水郡後周州廢置九隴郡隋開皇初郡廢仁壽初置濛州大業初州廢屬蜀郡唐武德三年復置濛州貞觀三年又廢垂拱二年置彭州以天彭山

為名漢蒯氏道有大彭山兩山相對其形如闕謂之天
彭門亦曰天彭闕江水逕其間今在茂州特取其名耳
天寶元年曰濛陽郡皇朝因之今縣三

望九隴縣本漢繁縣地晉置晉壽縣後周改為九隴及
置九隴郡隋屬蜀郡唐置彭州武后時益州長史劉易
從決唐昌沱江鑿川派流合壩口琅岐水溉九隴唐昌
田民為立祠有九隴山

望崇寧縣唐儀鳳二年析九隴導江邛縣置唐昌縣屬

益州垂拱二年來屬長壽二年改為周昌神龍初復故名皇朝開寶四年改為永昌崇寧中改為崇寧

望濛陽縣唐儀鳳二年析九隴什邡雒縣置屬益州垂拱二年來屬有瀾濛水

上綿州秦屬蜀郡漢屬廣漢郡晉宋齊屬梓潼郡後置巴西郡後魏兼置潼州隋開皇初郡廢改潼州曰綿州以綿水為名大業初州廢置金山郡唐武德元年復為綿州天寶元年曰巴西郡皇朝因之今縣八

望巴西縣本漢涪縣屬廣漢郡後漢伐公孫述裨將臧
宮進破涪城斬公孫恢即此西魏改涪曰巴西隋置金
山郡唐置綿州有涪水

望彰明縣本漢涪縣地後置漢昌縣西魏改為昌隆隋
屬金山郡唐屬綿州先天元年改曰昌明後唐改曰彰
明有涪水有唐李白碑白之先世嘗流雋州其後內移
白生於此縣

繁魏城縣本漢涪縣地西魏置隋屬金山郡唐屬綿州

繫羅江縣本漢涪縣地後置潺亭縣西魏改為萬安及
置萬安郡隋開皇初郡廢屬金山郡唐屬綿州天寶元
年改為羅江按水經注潺水出潺山水源有金銀歷潺
亭而下注涪水今羅江即古之潺亭則羅江水亦古所
謂潺水歟有羅潰化江因以為名

上神泉縣本漢涪縣地後置西充國隋開皇十六年改
曰神泉以縣西有泉能愈疾故也屬金山郡唐屬綿州
有綿水

上龍安縣本金山縣後周置隋屬金山郡唐屬綿州武德三年更名龍安有龍安山西北有松嶺關西昌鎮本益昌縣隋開皇四年省入金山唐永淳元年復置西昌縣屬綿州皇朝熙寧五年省為鎮入龍安

中鹽泉縣唐武德三年析魏城置屬綿州有梓潼水

中石泉縣本漢廣柔縣地屬蜀郡隋為汶山縣地屬汶山郡唐貞觀八年析置石泉縣屬茂州皇朝熙寧九年來屬有石紐山禹之所生也華陽國志云夷人營其地

方百里不敢居畏禹神靈也

上漢州秦屬蜀郡漢屬廣漢郡東漢為郡治兼為益州
刺史治焉晉置新都郡宋齊為廣漢晉熙二郡隋開皇
初郡廢屬蜀郡唐垂拱二年分置漢州天寶元年為德
陽郡皇朝因之今縣四

上雒縣漢屬廣漢郡東漢為益州刺史治至劉焉乃徙
治成都晉置新都郡宋齊為廣漢郡隋屬蜀郡唐置漢
州洛水出章山南逕雒縣因取名焉劉備自涪攻雒龐

士元中流矢死於此有嚴君平卜臺

望什邡縣漢屬廣漢郡高帝封雍齒為侯國晉屬新都
郡後周置曰方寧隋省之唐武德二年析雒縣復置什
邡屬漢州有洛通山即右章山也洛水所出

望綿竹縣漢屬廣漢郡故城在縣東晉屬新都郡後置
晉熙郡隋開皇初郡廢為晉熙縣十八年改曰孝水大
業三年復曰綿竹唐武德三年屬濛州貞觀二年州廢
屬益州垂拱二年來屬有紫巖山綿水所出孝泉鎮東

漢姜詩所居詩至孝母好飲江水嗜魚膾舍側忽有酒
泉常出雙鯉

望德陽縣本綿竹縣地東漢析置屬廣漢郡晉因之後
周廢焉唐武德三年分雒縣復置屬益州垂拱二年來
屬魏將鄧艾自油江出綿竹破蜀將諸葛瞻於此因築
京觀有鹿頭關唐高宗文破劉闢守兵於此有劍閣道
三十里至險

上嘉州秦屬蜀郡二漢屬犍為郡晉宋齊梁皆因之西

魏置眉州取峩眉山為名後周改曰青州取青衣水為名後又改曰嘉州取漢嘉郡為名隋大業初置眉山郡唐武德元年復曰嘉州天寶元年曰犍為郡皇朝因之今縣五

上龍游縣本漢南安縣初屬蜀郡故鄧通在文帝景帝時而其傳云蜀郡南安人也武帝平夜郎置犍為郡乃以南安為之屬縣焉東南以後皆因之後周置峨眉山縣隋開皇九年改曰青衣隋軍伐陳有龍見于江引舟而

進十年改曰龍游唐屬嘉州自西魏以來置眉州青州
嘉州眉山郡皆治此漢之青衣本屬蜀郡其地於今為
雅之廬山名山公孫述據蜀青衣不賓光武嘉之陽嘉
二年改曰漢嘉劉先主因置漢嘉郡領漢嘉徙陽嚴道
旄牛四縣實今之雅州廬山名山地也青衣水出廬山
徼外東南流逕嚴道洪雅夾江至龍游而與岷江合龍
游居青衣水口有青水山青衣津故前世於是置青州
嘉州不知龍游乃南安故地非青衣漢嘉本土也唐顏

師古注漢書彭越傳杜佑述通典嘉州事皆以龍游為
青衣蓋已久矣平羌鎮本漢南安縣地後周置平羌縣
及平羌郡隋開皇初郡廢屬眉山郡皇朝熙寧五年省
入龍游有熊耳峽諸葛忠武鑿山開道蓋今湖濱峽云

上洪雅縣後周洪雅鎮隋開皇十三年置縣屬眉山郡
唐武德元年置犍州貞觀元年州廢屬眉州開元七年
置義州半以獠戶置南安平鄉二縣八年州廢省二縣
以洪雅屬眉州皇朝淳化四年來屬

中夾江縣本漢南安縣地隋開皇三年析龍游平羌置屬眉山郡唐屬嘉州舊治涇上武德元年移於今治

中峨眉縣本漢南縣地隋開皇十三年置屬眉山郡唐屬嘉州有峨眉山大渡河綏山鎮隋招致生獠於榮樂城置綏山縣取旁山以為名唐屬嘉州皇朝乾德四年省入峨眉

下犍為縣本武陽縣後周置隋開皇初改曰犍為屬戎州唐上元元年来屬其後遂以嘉州為犍為郡按漢武

帝開夜郎置犍為郡因山立名初治邕縣其地蓋在今
瀘南徼外後徙治犍道今戎州是也東漢及晉徙治武
陽今眉州彭山是也始雖因平夜郎以置犍為然郡之
北境本大半本巴蜀舊縣如南安武陽牛鞞資中江陽
犍道是也而漢史地理志夜郎縣乃屬牂牁郡則知今
嘉州非夜郎故地夜郎蓋於今珍播等州人徒見嘉州
號犍為郡及領犍為縣遂以為本夜郎國杜佑述通典
亦承誤焉郡之東山有大石雙峙說者以為唐蒙開夜

郎立此石闕以表之抑又妄矣

上邳州秦屬蜀郡二漢及晉皆因之宋齊屬晉康郡梁
置邳州西魏因之及置臨邳郡隋開皇初郡廢大業初
州廢屬臨邳郡唐武德元年置邳州天寶元年曰臨邳
郡今縣六

望臨邳縣漢晉屬蜀郡西魏置臨邳郡隋開皇初郡廢
唐顯慶二年邳州自依政徙治焉漢司馬相如酤酒令
文君當壚相如滌器於市中即此臨溪鎮本臨邳縣地

西魏分置臨溪縣隋省之唐復置屬邛州皇朝熙寧五年省入臨邛

望依政縣本臨邛縣地梁置邛州西魏因之及置依政縣隋大業初州廢唐初邛州治此後徙治臨邛

望安仁縣唐武德三年析臨邛依政置屬邛州貞觀十七年省咸亨元年復置有斜江水

望大邑縣唐咸亨二年析益州之晉原置屬邛州有鶴鳴山後漢張道陵隱居於此著作符書有斜江水

上蒲江縣本臨邛縣地西魏置廣定縣及蒲原郡隋開
皇初郡廢仁壽初改廣定曰蒲江屬臨邛郡唐曰蒲江
屬邛州有蒲江水

中火井縣本臨邛縣地後周置火井鎮隋末升為縣唐
屬邛州有火井舊說云欲出其火先以家火投之須臾
隆隆如雷聲爛然通天光曜十里左思蜀都賦云火井
沉榮於幽泉高焰飛煽於天垂今無復見矣有邛池李
膺記曰臨邛老姥得水蛇飼之漸長丈餘後姥為令所

殺蛇見夢於令曰我當報仇是夜四十里俱陷為湖按
陷池在邛都今為化外雋州非臨

闕

輿地廣記卷二十九